

## **YESU TI MONO—Baleso 5 sambu na bana ya ke mona mpasi**

**Leso 1: Yesu zaba zina na mono.** (Histoire ya Zashe, Luka 19:1-10), Yoane 10:14 p. 2-10

**Leso 2: Yesu zaba yonso ya mono me sala.** (Histoire ya Yesu ntangu Yandi solulaka na nkento na ndumba na nto ya Samaria), Yoane 4:1-30) Bankunga 69:5 p. 11-18

**Leso 3: Yesu zola mono.** (Histoire ya Yesu ti bana), Matayo 19:13-15) Roma 5:8 p. 19-21

**Leso 4: Yesu zola kulolula mono.** (Histoire ya Yesu ntangu Yandi lolulaka bambeni na zulu ya kulunsi, Luka 23:32-47) Luka 23:34 p. 22-28

**Leso 5: Yesu zola sadisa mono kulolula bantu ya nkaka.** (Histoire ya Yosefi ntangu yandi lolulaka bampangi na yandi), Kuyantika 37:12-28, 45:1-5, 47:1-6) Efezo 4:32 p. 29-33

### **BANKUNGA YA KWENDA NZILA MOSI TI BALESO YAI:**

(Yonso keke na mukanda “Bankunga ya Ecodim” ya MCE)

2 Korinto 5:17

Bu Yesu Kele na Mono

Kilumbu Yai

Kizitu Yonso

Masumu na Mono Me Kwenda

Ngemba Ikele

Yesu Zaba Zina na Mono

### **Kikuma ya Nene ya Baleso Yai Yonso:**

Baleso yai ikele kubenda bana ya me mona mpasi mingi na luzingu na bo kuzaba ti kulanda Yesu, ti kukangula ntima na bo na Yandi sambu Yandi belula konso sika bo me lwala na ntima. Beto me sala ya na mabanza kusadisa bana ya me kangama na mvita to mambu ya nkaka ya mbi, ya me sala mbi na kati ya mambu ya me banga bo. *(Konso lesa ta vanda na kikuma na yo mosi mpi.)*

### **Inki mutindu kusadila baleso yai:**

Beto me sonika baleso yai na mpila nde longi lenda tanga bapoint yina, mosi-mosi. Ntangu yo songa activité ya bana ta sala, longi ta songa bo inki kusala ti twadisa bo kusala yo. Baleso yai me katuka na Bible. Ebuna, mbote nge tula lesa ya nge ke tanga na zulu ya Bible sambu bana bakisa nswalu nde yo keke malongi ya Bible.

## **LESO 1- YESU ZABA ZINA NA MONO. (HISTOIRE YA ZASHE)**

**Histoire yai ke monika na Bible na:** Luka 19:1-10 ti Yoane 10:14

### **Kusala na ntwala nge longa:**

Kana mpila ikele, mona papier ti bacrayola sambu bana dessiner. Muntu ya zaba nkunga Zashe longa nge yo, to nge kuwa yo na CD ti longuka yo.

Tanga ti longuka histoire na Bible na ndinga ya nge ta sadila kulonga bana, ti tula kidimbu na sika yina, sambu nge kangula yo na Luka 19 nswalu ntangu nge zola kulonga. Longuka verse ya bana ta longuka. Mona bafoto ya Yesu Mvungi ya Mbote ti ya Yesu ti Bana. Sala pratika na bisika nge fweti twadisa partisipation ya bana—repetitio ritimike ti bisika bo ta yimba.

### **Kikuma ya Leso 1:**

Na nsuka ya lesu yai, beto zola konso mwana kubakisa nde Nzambi zola bo mingi. Mpila bo ta bakisa yai kele kubakisa nde Yandi zaba zina na yandi. Bo ta zaba mpi nde Yesu lenda songa bo nde kana bo me sala mbi, inki mutindu kusala nde yonso kuma mbote diakaSongs:

#### **Bankunga ya kwenda nzila mosi ti lesu yai:**

YESU ZABA ZINA NA MONO

Yesu zola mono

Yandi zaba zina na mono (yimba mbala mingi)

‘Buna mono zola Yandi mpi!

ZASHE VANDAKA NKUFI MINGI

Zashe vandaka nkufi mingi

Yandi monaka nsoni

Yandi waka nde Yesu ke kwisa

Buna yandi mataka na nti

Ti bu Yesu kwisaka kuna,

Yandi talaka na nti

Ti Yandi tubaka, “Zashe! Nge kwisa kulumuka!”

Beto kwenda na nzo na nge.

Beto kwenda na nzo na nge.

**Verse ya kulonguka:** *Yoane 10:14-15*

*“Mono kele ngungudi mosi ya mbote ya mememe. Mutindu Tata kuzaba mono, mono mpi zaba Tata, mutindu yo yina mpi mono zaba mameme na mono, mameme na mono mpi zaba mono.”*

*Longi, tendula disongidila: Ngungudi, mameme*

*Longi, longa bana verse na repetition ritimike, ti kukina.*

### **Kuyantika Leso:**

Keti nge zola kuwa zina na nge? Yo ke pesa nge kiese? Mbala ya nkaka mama na nge to mpangi na nge binga zina na nge bu ntangu me lunga ya kudia. “Ntonga! Yoane! Kitoko! Kwise! Ntangu ya Kudia me lunga!” Yo pesa nge kiese. Kele mbote kana nge kuwa muntu binga zina na nge mpila yina. Bantu mingi zola zina na bo, sambu zina ke songa muntu kele nani. Ntangu nge kuwa muntu binga zina na nge, nge zaba nde yandi ke tuba na nge, yandi mpi kuzaba nge.

### **Transitio na Leso ya Bible:**

Na ndambu ya Bible beto ke mona bubuyai, beto mona nde Yesu zabaka zina ya muntu, ti Yandi bingaka muntu yina na zina na yandi. Kansi, yo vandaka mbala ya ntete ya Yesu me mona yandi, ti ata muntu mosi ve me songa Yesu zina ya muntu yina. Muntu yina vandaka Zashe, ti beto mona yandi na mukanda ya Luka, kapu 19. *(Longi, kangula Bible na nge ti simba yo na diboko.)*

### **Histoire ya Bible ya kutangila bana malembe-malembe:**

- Yesu vandaka kutambula, bonso Yandi tambulaka mbala mingi na bisika ya Yandi kwendaka na kisalu na Yandi, kulonga bantu malongi ya mbote, kubelula bantu ya maladi, kubasisa bambeve ya mbi, ti, mbala na mbala, ata kutedimisa bantu ya me fwaka!

*(Bana: Bo sala bageste ya “kutambula” na maboko na bo.)*

- Yandi kwisaka na bwala ya nene zina ya Yeriko.

*(Bana tuba nde: “Yeriko!”)*

- Yandi vandaka kutambula na Yeriko na nzila kukwenda na sika ya nkaka.

*(Bana: Songa na diboko nde bo ke luta sika yai, ke kwenda na sika ya nkaka.)*

- Na kati ya bwala Yeriko zingaka muntu mosi ya monaka bumosi mingi na ntima. Zina na yandi Zashe. Yesu me mona Zashe ntete ve.

*(Bana tuba na ndinga ya mawa: “Zashe—muntu ya bumosi mingi!” )*

- Zashe vandaka mvwama. Yandi vandaka mvwama sambu yandi twadisaka bantu ya simbaka mpaku ya bantu fweti futa na Mfumu ya nene na bwala Roma.

*(Bana tuba na ndinga ya mawa: “Mvwama ya bumosi!”)*

- Bantu ya simbaka mpaku bonso Zashe, konso ntangu bo yibaka bantu (*longi, songa luse ya mbi*). Bo sosaka bampila yonso na kubenda bantu kupesa bo mbongo kuluta yina ya leta tubaka. Ebuna bo mosi vandaka kusimba ndambu ya mbongo yina. Zashe salaka yo mpi. Mpidina, Zashe kumaka mvwama mingi. Yandi zibaka bantu ya nkaka na nzila ya trisheri. Yandi muyibi!

*(Bana: Nikisa ntu ti tuba na ndinga ya mawa, “Mvwama ya muyibi! Mvwama ya bumosi!”)*

- Ata muntu ve zolaka bantu ya mpaku bonso Zashe. Zashe vandaka mvwama. Yandi vandaka na mbongo mingi, bima mingi ya kitoko, kansi yandi vandaka na banduku ve ata fioti. Ata muntu zolaka yandi ve. Bumosi kuvandaka ngolo na yandi.

*(Bana: Nikisa bantu na mawa ti tuba, “Zashe! Ata nduku mosi ve! Muntu ya bumosi!”)*

- Zashe me wa mpila Yesu salaka bima ya mbote, bima ya kuyituka. Ntangu yandi waka nde Yesu vandaka kuluta na bwala na yandi, yandi zolaka kumona Yandi.

*(Bana: Tuba na kiese mingi, “Mono zola mona Yesu! Mono zola mona Yesu!”)*

- Kansi, mambu vandaka nde bantu mingi vandaka kulanda Yesu, ti Zashe vandaka muntu mosi ya nkufi mingi. Bantu mingi vandaka kukanga yandi nzila. Yandi monaka kaka bikoso ya maboko na bo! (*Longi, songa kikoso ya diboko ya nge, ti bana yonso landa nge.*) Mpila vandaka ve nde muntu ya nkufi bonso Zashe lenda mona Yesu na kati ya bantu mingi mutindu yina!

*(Bana, Sala bonso nge ke pusa bantu sambu kumona Yesu, kansi mpila ikele ve, Yandi ke monika kaka ve. Bo tuba, “Mono ke mona Yesu ve! Mono ke mona Yesu ve!”)*

- Kansi Z Ashe zolaka MINGI kumona Yesu. Yandi waka bonso yandi FWETI mona Yesu. Ebuna, yandi bakaka ntinu kuluta na ntwala ya bantu na nzila. Yandi zabaka nde Yesu fweti luta na nzila yina.

*(Bana: Sala bageste bonso bo ke baka ntinu. Bo tuba nde. "Mono FWETI mona Yesu! Mono FWETI mona Yesu!")*

- Yandi mataka na zulu ya nti ya bo bingaka sikamor, na mpila nde yandi kumona Yesu mbote.

*(Bana: Sala bageste bonso bo ke mata na zulu ya nti.)*

- Yo zolaka kuvanda KITOKO kaka kumona Yesu!
- Mbala ya nkaka Z Ashe monaka nde Yesu na vanda na intere ve na yandi. Yandi muntu ya trisheri, yandi muntu ya mpaku, yandi muyibi, yandi muntu ya ata muntu mosi zolaka ve, yandi muntu ya vandaka na nduku mosi ve, yandi muntu ya nkufi ya lendaka ve kumona Yesu kukonda kumata na zulu ya nti!

*(Bana, tula ntu na nsi, bonso bo ke na mawa ti nsoni)*

- Ata mpila yina yonso, yo zolaka kuvanda mbote kaka kumona Yesu! Z Ashe zabaka nde Yesu vandaka muntu mosi special.

*(Bana, yimba ti kina na ritime: "Muntu mosi special! Muntu mosi special!")*

- Z Ashe mataka na zulu ya nti, ebuna yandi monaka Yesu kukwisa na nzila. Bantu mingi vandaka kuziunga yandi. Yesu kwisaka penepene. Ntama ve, Yandi zolaka kuluta na nsi ya Z Ashe, ebuna Yandi zolaka kukwenda.

*(Bana: Nata diboko kuluta penepene na nge diaka ti diaka, ti tuba na kimvuka: "Yesu kwisaka, ti kwisaka, ti kwisaka.")*

- Kansi, ntangu Yesu kwisaka na nsi ya nti ya Sicamore sika Z Ashe vandaka, Yandi KANGAKA.

*(Bana: Bula maboko mbala mosi, ti tuba kaka ntangu yina, "KANGAKA.")*

- Keti nge banza Z Ashe vandaka na boma? Keti nge yindula nde yandi vandaka na boma nde Yesu ta mona yandi? Keti yandi yindulaka nde Yesu ta nganina Yandi sambu yandi mataka na nti yina? Mbala ya nkaka yandi waka boma nde Yesu ta yula yandi makambo ya mambi yonso yandi me sala. Mbala ya nkaka yandi waka boma nde Yesu ta zaba dezia mambu yina yonso ya mbi. Mbala ya nkaka yandi waka boma nde Yesu to songa

bantu yonso mambi yina yonso. Kana yo ta salama mpidina, Z Ashe zolaka kumona nsoni mingi!

- Yesu talaka na zulu. (Longi, tala na zulu, ti songa bana kulanda nge.) Yandi monaka Z Ashe kuna—na zulu ya nti.
- Yesu bingaka yandi, “Z Ashe! Sasuka! Kwisa kulumuka! Bubuyai mono fweti kwenda kudia na nzo na nge!”

*(Bana tala na zulu ti tuba, “Z Ashe! Sasuka!”)*

- Inki? Keti Z Ashe me wa mbote? Yesu bingaka yandi—NA ZINA NA YANDI! Kansi—inki mutindu Yesu zabaka zina na yandi?

*(Bana tuba na kiese: “Yesu zabaka zina na yandi!”)*

- “Yesu zaba zina na mono! Yesu zaba zina na mono!” Mbala ya nkaka Z Ashe yindulaka mutindu yina.

*(Bana tuba: “Yesu zaba zina na mono! Yesu zaba mono!”)*

- Mono banza nde ata muntu mosi ve me binga Z Ashe na zina na yandi na ntwala. Bantu kuluta mingi bingaka yandi “Muntu ya mpaku” to “Muyibi” Bantu kuluta mingi tubaka ata yo, na ntima ya kufinga.

*(Bana tuba nde: “Muyibi! Muyibi!”)*

- Kansi Yesu! Yesu zabaka zina na yandi! Z Ashe monaka bonso Yesu vandaka nduku. Ah, yandi waka yo mbote kuvanda na nduku! Yai mbala ya ntete na yandi kuvanda na nduku!
- Z Ashe kingaka ve. Yandi kulumukaka na nti yina. Nswalu, yandi vandaka kutelema na ntwala ya Yesu.

*(Bana: Sala bageste bonso bo ke kulumuka na nti na nswalu yonso, ebuna bo ke telema na ntwala ya Yesu.)*

- Z Ashe bakaka Yesu na kiese yonso. Mbala ya nkaka yandi simbaka Yesu na maboko, ti Yesu simbaka yandi mpi.
- Bantu ya nkaka ya vandaka kulanda Yesu, bo bakisaka ve sambu na inki Yesu yambaka Z Ashe, muntu ya masumu mingi, muntu ya me pesa bo mpasi.

*(Bana nikisa ntu bonso bo ke bakisa ve ti bo ke ndima ve.)*

- Yesu ta kwenda na nzo ya Z Ashe? Inki mutindu Yesu lendaka kuvanda kusolula ti kudia sikamosi ti muntu ya vandaka muntu ya mbi bonso Z Ashe?
- Bantu yina, bo bakisaka ve nde beto YONSO keke bantu ya masumu. Kaka Z Ashe ve, kansi bo mpi vandaka bantu ya masumu. Beto yonso me sala mambu ya imbi ya pesaka Nzambi kiese ve. Beto yonso me vila nzila.

*(Bana: Bo songa diboko na bantu ya nkaka ti bo tuba nde, "Beto yonso keke bankwa masumu. Beto yonso keke bankwa-masumu.")*

- Bantu yina, bo bakisaka ve nde Yesu zola ata bo ya me sala masumu ya nene. Yandi kwisaka awa na nsi-ntoto kusonga luzolo na Yandi na bankwa-masumu bonso Z Ashe, bonso nge, ti bonso mono.

*(Bana kudisimba ti tuba, "Yandi kwisaka kusonga luzolo na beto.")*

- Yesu kwendaka na nzo ya Z Ashe. Bo kudiaka sikamosi. Yesu solulaka na Z Ashe bonso muntu ta solula ti nduku na yandi.
- Ntangu Z Ashe monaka nde, ata Yesu zabaka Yandi, Yandi zolaka yandi nkwa-masumu, yandi balulukaka ntima na yandi. Yandi yantikaka KUKWIKILA na Yesu. Sambu yandi kwikilaka, yandi zolaka kusala mambu ya ta songa nde yandi me balula ntima. Yesu me pesa yandi ntima mosi ya mpa!

*(Bana: Tuba na ritime: "Yandi kwikilaka Yesu. Yesu pesaka yandi ntima na mpa!")*

- Ebuna, Z Ashe yantikaka kuyindula bimvwama na yandi. Yandi bakisaka nde yandi me kuma mvwama sambu yandi me yiba bantu, ata bansukami, yandi me yiba bo. Yo yina, yandi zengaka kuvutula mbongo yonso yandi me yiba. Yandi zengaka kupesa bansukami ndambu ya zole ya bima yonso na yandi. *(Longi tula bibende ya mbongo kumi na zulu ya mesa. Kabisa yo na bandambu moi, ebuna pesa demi na yo na bana ya classe ya keke bansukami.)*

*(Bana, sala bageste bonso beno ke pesa mbongo na bansukami.)*

- Z Ashe bambukaka ndambu ya bantu ya yandi me yiba vandaka nani. Yandi tubaka luvunu sambu na kuyiba bo. Kansi, ntangu yai, ntima na yandi me change. Yandi tubaka nde yandi zolaka kuvutula bantu yina MBALA IYA yina ya yandi me yiba bo. Kana yandi yibaka Shilling mosi, yandi bakaka lukanu kuvutula bo bashilling IYA. A-yai! Kieleka, ntima na yandi me change sambu yandi me yamba Yesu! *(Longi, baka iya ya bashilling*

*ya me bikala. Kwenda na mwana ya me baka ve mbongo. Tuba nde, "Pardo mingi sambu mono me yiba ve. Mono yibaka shilling mosi na nge. Awa mono zola vutula bashilling 4. Mono me kuma mulandi ya Yesu, ebuna mono zola diaka ve kuyiba diaka." Pesa bashilling 4 na mwana yina.)*

- Yesu monaka mpila Zashe balulaka ntima na yandi. Yandi tubaka nde, "Bubuyai mpulusu me kwisa na nzo yai." Ntima ya Zashe me change. Ntangu yai, yandi kwikilaka Yesu. Yandi me guluka! Nzambi me lolula yandi! Zashe me kuma mwana ya Nzambi!

*(Bana, bula maboko ti yimba nde, "Mpulusu me kwisa na nzo yai! Zashe me kwikila Yesu! O yea!")*

- Ti mambu yai yonso yantikaka sambu Yesu zabaka zina ya Zashe.

*(Bana yimba nde, "Yesu zabaka zina na yandi, Yesu zabaka zina na yandi.")*

- Kansi kuluta mbote, Yesu zaba zina NA MONO, mpi! Yesu zaba zina NA NGE, mpi!

*(Bana yimba, "Yesu zaba zina na MONO! Yesu zaba zina na MONO!")*

#### **YULA BANA BONSO YAI:**

- Zashe vandaka muntu ya inki mutindu?

*(Muntu ya nkufi, muntu ya bakaka mpaku sambu ya Mfumu ya nene na bwala Roma, muyibi, muntu ya luvunu, muntu ya bumosi, etc.)*

- Zashe zingaka wapi?

*(Na bwala Yeriko)*

- Keti Zashe vandaka na banduku mingi?

*(Ikele ve. Yandi vandaka muntu mosi ya bumosi. Bantu zolaka yandi ve sambu yandi yibaka bo.)*

- Sambu na inki Zashe mataka na zulu ya nti ya Sikamore?

*(Kumona Yesu sambu yandi vandaka nkufi)*

- Inki Yesu zabaka sambu na Zashe?

*(Yesu zabaka zina na yandi. Yandi bingaka Zashe na zina na yandi.)*

- Yesu kwendaka wapi ti Zashe?

*(Na nzo na yandi Zashe)*



- Z Ashe salaka inki kusonga nde kieleka yandi me balula ntima?  
*(Yandi vutulaka yina ya yandi me yiba, ti yandi sadisaka bansukami.)*
- Keti Yesu zaba zina na nge mpi?  
*(Ee, yandi zaba zina ya mono.)*

#### **KUBINGA BAVIDI NA YESU:**

- Yesu zaba zina na nge, mpi. Ata mbala ya nkaka mono zaba zina na nge ntete ve, Yesu zaba yo dezia.
- Yesu zaba makambo yonso sambu na nge. Yandi zaba inki nge me sala. Yandi zaba masumu na nge yonso.
- Yesu zaba ntima na nge. Yandi me wa konso ndinga ya nge me tuba. Mingi Yandi ke mona mbi, kansi ata mpila yina, Yandi ke zola nge mingi. Yandi zola kukwisa na nzo na nge. Yandi zola kuma nduku na nge, ti nge nduku na Yandi.
- Mbala ya nkaka nge kele na banduku mingi ya nkaka. Mbala ya nkaka nge kele na ata nduku mosi ve. Yesu zola vanda nduku na nge.
- Mbala ya nkaka nge me sala mambu ya nsoni. Nge mona bonso nge me kuma muntu mosi ya mpamba. Bambuka nde, ntangu Z Ashe kwikilaka Yesu, Yesu lolulaka yandi na mambu yonso ya mbi, ya nsoni ya yandi me sala.
- Yesu ke binga nge bubuyai. Keti nge ta tuba “Ee” na Yandi sesepiyai? Keti nge ta tula ntima na Yandi?
- Kana nge me tula ntima na Yesu ntete ve, kansi bubuyai nge zola tuba “Ee” na Yandi, sesepiyai nge lenda binga Yandi na ntima na nge. Kaka songa yandi nde nge me sala mbi. Yandi zaba yo dezia, kansi Yandi zola nge kundima yo na munoko na nge. Ebuna binga Yandi kukota na ntima ti na luzingu na nge. Yandi me sila nde Yandi ta kota, ti Yandi ta lolula masumu na nge yonso. Yandi ta pesa nge moyo ya mpa.

#### **Yimba nkunga yai:**

KIZITU YONSO MENE KATUKA

Kizitu yonso mene katuka

Me katuka, me katuka

Kizitu yonso mene katuka  
Bu Yesu me kwisa! Ah! (yimba diaka)

**Devoir sambu na bakristo:**

- Ntangu Z Ashe kwikilaka Yesu, Yesu songaka yandi inki mutindu yandi lenda yantika kutunga luzingu ya mpa. Ntangu Yesu songaka yandi mambu yai, Z Ashe vandaka na kiese kusala bonso Yesu me songa yandi. Ebuna yandi vutulaka yonso ya yandi me yiba na bantu. Kizitu ya nene katukaka ntangu yandi salaka yo!
- Bu nge me tula ntima na Yesu, Yandi me lolula nge. Yandi me pesa nge ntima ya mpa, ntima ya kitoko. Ntangu yai, Yandi ta songa nge na ntima inki nge lenda sala sambu na kuyantika luzingu ya mpa.
- Keti nge zola lomba Yesu kusonga nge inki kusala? Lomba Yandi kutula na mabanza to na ntima na nge inki mutindu nge lenda songa nde nge me balula ntima.

*(Longi, kana papier ikele, bana lenda dessiner inki Yesu ke songa bo kusala. Kana bana lenda sonika, bo sonika ntete zina na papier. Ntangu bo ke dessiner, lomba bo kutendula nge inki bo ke songa. Tala mbote kumona kana bafoto bo ke sala ke songa nde bo ke na mfunu ya lombilu to ya conseil special.)*

**Yimba nkunga yai:**

**ZASHE VANDAKA NKUFI MINGI**

Z Ashe vandaka nkufi mingi  
Yandi monaka nsoni  
Yandi waka nde Yesu ke kwisa  
Buna yandi mataka na nti  
Ti bu Yesu kwisaka kuna,  
Yandi talaka na nti  
Ti Yandi tubaka, "Z Ashe! Nge kwisa kulumuka!"  
Beto kwenda na nzo na nge.  
Beto kwenda na nzo na nge.  
  
Beto kudia na nzo na nge.  
Beto kudia na nzo na nge.





## LESO 2—YESU ZABA INKI MONO ME SALA

**Histoire:** Yesu solula ti nkento ya ndumba na nto ya Samaria.

**Histoire yai ke monika na:** Yoane 4:1-30, Bankunga 69:5

**Kusala na ntwala nge longa:**

Tanga histoire na Bible, Yoane kapu 4. Kuta papier na sika yina na Bible sambu nge lenda mona yo nswalu. Zikisa zina ya bwala sika nge ke longa ti district na yo. Pratike mpila bana ta participe ti bankunga.

**Kikuma ya Leso yai:**

Na nsuka ya lesu yai, bana ta zaba nde Yesu zaba mambu yonso ya bo me sala, ata ya mbote, ata ya mbi, ti Yandi zola kulolua masumu na bo. Ebuna bo ta kwisa na Yandi sambu Yandi kulolula bo.

**Kuyantika Leso:**

- Nkento mosi ya Bible vandaka na mambu mosi ya nsoni na luzingu na yandi.
- Yandi me sala mambu ya nsoni, mambu ya lungaka ve na meso ya Nzambi. Yandi monaka nsoni na ntima, sambu yandi bakisaka nde yandi me sala masumu.
- Nkento yai zolaka ve nde bantu kuzaba mambu na yandi.
- Keti beno zola kuwa histoire na yandi?

**Kulonga Leso ya Bible:**

*(Longi, kangula Bible na Yoane kapu 4. Bika yo kukanguka na kati ya lesu yonso.)*

- Lumbu mosi, Yesu vandaka kutambula. Yandi vandaka na mfunu ya kuluta na nzila ya Samaria.

(Bana: Sala bageste ti maboko na bo bonso bo ke tambula.)

- Yesu vandaka muYuda, to beto lenda binga yandi Zwif. Bawif to Bayuda, bo zolaka ve bantu ya Samaria. Bo zolaka ve kutambula na ntoto ya Samaria. Bo monaka nde bo fweti luta na lweka, sambu bo zolaka ve kupesa mbote na bantu ya Samaria.

(Bana: Tula diboko mosi na zulu ya bureau. Na ndinga na mbi tuba nde, “Samaria yo yai.” Na diboko ya nkaka, sala cercle ya nene na lweka ya Samaria. Na ndinga mosi ya mbi tuba nde, “Mono ke solula VE ti bantu ya Samaria.”

- Yai vandaka mpila bantu ya nkaka salaka. Kansi Jesus salaka mpidina ve! Yandi monaka nde Yandi FWETI kwenda na Samaria. Yandi zabaka nde kuna vandaka muntu mosi ya vandaka na mfunu na Yandi.
- Yesu kwisaka na bwala ya Samaria zina ya Sychar. Samaria vandaka districte bonso (longi, pesa zina ya districte sika nge ikele), ti Sychar vandaka bwala bonso (longi, pesa zina ya bwala sika nge ikele.)

- Na lweka ya bwala ya Sychar vandaka nto sika bantu kwisaka kubaka masa.
- Yesu vandaka me lemba, sambu Yandi me tambula ntangu mingi, kiteso ya baheure 6. Kana yandi yantikaka na suka yonso, yo ta vanda kiteso ya midi.

(Bana: Tuba nde, “Yandi me lemba, yandi me lemba” ti songa geste bonso bo me lemba.

- Yesu vandaka na lweka ya nto sambu na kupema. (Longi, vanda na zulu ya mesa ti kiti.) Balonguki na Yandi kwendaka na bwala sambu na kusumba madia, kansi Yesu bikalaka na nto sambu na kupema.

(Bana: Tuba na ritime to yimba: “Yesu pemaka na nto.”

- Yai vandaka ve ntangu ya bantu mingi kwisaka kubaka masa. Kansi tala! Nkento vandaka kukwisa. Nkento ya Samaria. Yandi kwisaka kubaka masa.

(Bana: Tubana bo na bo nde, “Sambu na inki nkento yai ke kwisa ntangu yai?”

- Ntangu nkento yina kwisaka na nto, Yesu lombaka nkento yina kupesa Yandi masa ya kunwa.

(Bana tubaka bo na bo nde: “Pesa mono masa ya kunwa!”

- Nkento vandaka na surprise. Yandi monaka nde Yesu vandaka Zwif. Yandi monaka nde Yandi vandaka muntu ya Samaria. “Inki mutindu nge ke lomba mona masa ya kunwa?” yandi yulaka. Mbala mingi, bantu na nge Bazwif zola ve kusolula ti beto bantu ya Samaria. Ata kupesa beto mbote, bo ke ndima ve.”

(Bana: Na ndinga bonso ya shocke, tuba nde, “Yandi tubaka na mono! Muzwif tubaka na mono!”

- Yesu zolaka kusadisa nkento yina. Ebuna Yandi tubaka nde, “Kana nge zabaka makabu ya Nzambi, kana nge bakisaka nani ke solula ti nge, nge zolaka kulomba yandi masa ya kunwa, ebuna Yandi zolaka kupesa nge MASA YA MOYO.”

(Bana: Tuba nde, “Kana mono bakisaka nani ke solula ti mono? Inki ndinga yai? Yandi ikele NANI?”

- Nkento yina bakisaka ve. “Longi,” yandi tubaka, “nge ke na kima ve kusimba masa, ti nto ikele mudindu. Nge ta baka masa ya moyo wapi?”
- “Nto yai, vandaka mbuta na beto Yakobo ya dimaka yo,” yandi tubaka. “Keti nge me luta yandi na nene?”

(Bana: “Yesu, keti nge ikele nene, kuluta nene ti mbuta na beto Yakobi?”

- Yesu talaka nkento yina. Yandi tubilaka yandi nde, “Konso muntu ya ta nwa masa ya nto yai, yandi ta wa nzala diaka. Kansi, konso muntu ya ta nwa masa ya nto yai ya Mono ta pesa yandi, yandi ta wa nzala diaka ve. Masa yina ta vanda na kati na yandi, yo ta vanda bonso nto ya masa na kati na yandi, ya ta pesa yandi masa ya mvula na mvula.”

(Bana: Tuba nde, “Masa ya mvula na mvula.”

- Inki? Vanda nzala diaka ve? Mambu mosi ya kiese! Mambu mosi ya kiese MINGI! Nkento yina vandaka na nzala mingi, kaka na munoko ve, kansi na ntima na Yandi yonso.

(Bana: Tuba nde, “Vanda nzala diaka ve? Kiese MINGI!”

- Nkento tubaka na Yesu nde, “Mfumu, pesa mono masa yai! Mono zola kuvanda na nzala diaka ve!”

(Bana: Tuba to yimba: “Pesa mono masa yai! Pesa mono masa yai!”

- Nkento ya Samaria waka nzala ya vandaka na luzingu na yandi. Ebuna Yesu zabaka nde ntangu me lunga kusonga yandi nde Yandi zabaka secret na yandi—secret ya pesaka yandi nsoni.)
- Yesu tubaka nde, “Kwenda! Binga bakala na nge, yandi kwisa.”

(Bana: Tuba to yimba: “Kwenda binga bakala na nge, yandi kwisa.”

- Ntangu Yesu tubaka mpidina, nkento zabaka nde Yesu zabaka secret na yandi, mbi na yandi. Yandi tulaka ntu na nsi na nsoni. Mfunu ve kukusa Yesu. Yandi ndimaka nde, “Mono....Mono kele na bakala ve.”

(Bana: Tuba to yimba nde, “Yesu zabaka makambo na yandi. Yesu zabaka makambo yonso na yandi.”)

- Yesu vutulaka nde, “Nge me tuba mbote. Nge ikele na bakala ve.” Inki mutindu Yandi zabaka? Keti Yandi zabaka mpi nde yandi vandaka kuzinga ti bakala ya vandaka bakala ya makwela ve? Keti Yandi zabaka nde yandi vandaka nkento ya ndumba? Keti Yandi zabaka nde yandi me sala bizumbu? Kansi inki mutindu Yesu lenda zaba mambu yina yonso? Yesu zabaka yandi ve.

(Bana: Tuba to yimba nde, “Secret na yandi na nsoni: Yandi vandaka kuzinga na kindumba.”)

- Yesu tubilaka yandi nde, “Nge me vandaka na babakala TANU, (Longi, songa misapi tanu ya diboko). Ntu ya nkento yina kubwaka. Yesu zabaka mbi na yandi yonso, nsoni na yandi yonso. Yandi me vanda kwikama ve na makwela na yandi.

(Bana: Tuba ti songa misapi, “Babakala: 1,2,3,4,5 “

- Bantu yonso zabaka nsoni na yandi. Yai vandaka raison yandi me kwisa na nto na ntangu ya bantu ya nkaka kwisaka ve. Mpidina, yandi monaka nde yandi ta kuta muntu ve.

(Bana: Nikisa ntu ti tuba na mawa nde, “Bantu yonso zabaka nsoni na yandi. Yesu zabaka nsoni na yandi.”)

- Yandi zolaka ve mpila bantu talaka yandi—bonso yandi vandaka mvindu.

(Bana: Tuba nde: “Mvindu. Nsoni. Mvindu. Nsoni.”)

- Ti Yesu zabaka mambu yina yonso. Inki mutindu Yesu zabaka inki yandi me sala?

(Bana yulana bo na bo nde, “Inki mutindu Yesu zabaka inki yandi me sala?”)

- Kansi Yesu vandaka kutuba diaka. “Ee, ti bakala ya nge kele ti yandi sesepiyai, yandi kele bakala na nge ve. Nge me tuba mambu yina mbote.”

(Bana: Tuba na ritime to yimba: “Yesu zabaka mbi na yandi yonso. Yesu zabaka mbi na yandi yonso.”)

- Inki? Yesu zabaka nde ata ntangu yai, yandi vandaka kuzinga kaka na masumu? Yandi monaka nsoni, mpila ve! (Longi, tula ntu na nsi bonso na nsoni.)

- Yandi zolaka kubumba mbi na yandi, kansi Yesu zabaka yo yonso.

(Bana: Tuba na ritime to yimba: “Yesu zabaka mbi na yandi yonso.”)

- Kansi, mpila Yesu solulaka ti yandi—yo vandaka ve bonso yandi monaka yandi mvindu. Yo vandaka bonso Yesu zolaka yandi! Inki mutindu?

(Bana, tuba na ritime to yimba: “Kansi, Yesu zolaka yandi! Yesu zolaka yandi! Inki mutindu? Inki mutindu? Yesu zolaka yandi!”)

- Nkento ya Samaria me yantika kubakisa nde Yesu vandaka special mingi. Yandi tubaka nde, “Mfumu, mono bakisa nde nge fweti vanda mutubi ya Nzambi.” Nkento bakisaka nde Yesu zabaka makambo yonso na yandi. Yandi zolaka kusolula mambu ya nkaka sambu bo landa ve kusolula kaka mambi yonso ya yandi me salaka.

(Bana: Tuba na ritime nde, “Solula mambu ya nkaka, mbi na mono ve, Solula mambu ya nkaka, mbi na mono ve.”)

- Uummm, kuyula Yesu inki? Mbala ya nkaka kuyula Yandi mambu ya religio.

(Bana: Yulana bo na bo: Yula Yesu inki? Kuyula Yesu inki?)

- Nkento tubaka nde, “Bambuta na beto sambaka Nzambi na zulu ya ngumba yai. Kansi Bazwif, bo tuba nde beto fweti samba na bwala Yerusalemi. Nge—nge tuba nde beto samba Nzambi wapi?” Ngyifula yina fweti benda Yesu kusolula mambu ya nkaka—mbi na yandi diaka ve!

- Yesu vutulaka nde, “Nkento, kwikila Mono, ntangu ke kwisa ti ntangu kele sesepiyai, nde bantu ya samba Nzambi ya kieleka, bo ta samba Tata Nzambi na mpeve ti na kieleka. Tata ke sosa bantu kusambila Yandi mutindu yina—na kieleka yonso.”

(Bana yimbana bo na bo:) “Sika yai to sika yina—Sambila Nzambi na kieleka yonso.”

- Yesu landaka kutuba, “Nzambi kele Mpeve. Bo ya sambila Yandi, bo fweti sambila Yandi na mpeve ti na kieleka.” Ai –yai! Yesu me vutuka na basecret na yandi! Yandi zabaka mbote nde yandi sambilaka Nzambi ve na mpeve ti na kieleka, mpila Yesu tubaka. Kansi mbala ya nkaka kana yandi yula Yesu diaka na mambu ya religio, Yesu ta tuba diaka ve na mbi na yandi.



- Nkento tubaka nde, “Mono zaba nde lumbu mosi, Mesia fweti kwisa, Mvulusi ya Nzambi silaka ntama. Ntangu Yandi kwisa, Yandi ta songa beto mambu yonso.” Yo ke monika nde nkento monaka bonso kukwisa ya Mesia vandaka mambu mosi ya ntama.

(Bana yimba: Mesia fweti kwisa, Mesia fweti kwisa.”

- Ee! Ee! Nkento, nge ke yindula mbote. Landa mabanza yai. Yindula mambu ya Mesia ya fweti kwisa!
- Yesu talaka nkento yina ti tubilaka yandi, “Mono ya ke solula ti nge, Mono Yandi yai. Mono kele Mesia ya fweti kwisa.”

(Bana yimba: “Yesu kele Mesia--Mesia ya fweti kwisa!” (Repeter.)

- Ntangu yina, balonguki ya Yesu vutukaka ti madia. Bo yitukaka kumona Yesu kusolula ti nkento ya Samaria, kansi bo monaka mpila ve kuyula Yandi mambu yina.
- Ntangu yina, nkento bakisaka kutuba ya Yesu. Ai-yai! Yandi vandaka kusolula na Mesia, ya Mvulusi ya bantu yonso me kinga bamvula na bamvula! Yandi vandaka kusolula na Muntu ya lenda katula masumu na yandi yonso! Yandi bakisaka nde masumu na yandi vandaka mingi ti yo vandaka nsoni, ti yandi vandaka kusolula na Muntu mosi kaka ya lenda lolula yandi!

(Bana: Yimba, “Inki lenda sukula? Kaka menga Mfumu Yesu!”

- Na kiese yonso, nkento vilaka masa na yandi. Yandi bakaka ntinu ti vutukaka na bwala.
- Yandi tubaka na bantu yonso, “Kwisa! Mona muntu ya me songa mono mambu yonso ya mono me sala na luzingu na mono! Keti yandi kele ve Mesia-Mvulusi ya beto me kinga?

(Bana yimba: “Yandi songaka bantu yonso nde Mesia me kwisa.”

- Yo yina, bantu mingi na bwala Sychar kwikilaka na Yesu sambu nkento songaka bo nde, “Yandi songaka mono mambu yonso ya mono me sala.”

(Bana: Nkento kwikilaka Yesu, ti bantu mingi, mpi.)

#### **Yula bana bonso yai:**

- Sambu na inki Yesu kwendaka na ntoto ya Samaria?

(Sambu nkento mosi vandaka kuna ya vandaka na mfunu ya lusadisu na Yandi.)

- Sambu na inki Bazwif solulaka ve ti bantu ya Samaria?  
(Bo zolaka bo ve.)
- Inki Yesu zolaka kupesa nkento yina?  
(Masa ya moyo)
- Inki nkento yina songaka bantu na bwala?  
(Kwisa mona muntu ya me songa mono yonso ya mono me sala.)
- Na nsuka ya masolula na bo, nkento yina bakisaka nde Yesu vandaka nani?  
(Mesia-Mvulusi ya fweti kwisa.)
- Inki mutindu Yesu zabaka makambu ya nkento yina?  
(Yandi keke Nzambi. Yandi zaba mambu yonso.)
- Yesu ke zaba inki sambu na nge, mpi?  
(Yandi ke zaba zina na nge, ti Yandi ke zaba yonso ya nge me sala—ya mbote ti ya mbi.)

**Kubinga bavidi na Yesu:**

- Yesu zaba mambu yonso ya nge me sala, mpi. Yandi zaba mambu ya mbote nge me sala, ti Yandi zaba mambu ya nsoni ya nge me sala. Yandi zaba mambu ya nge zola kuvila, mambu ya nge zola bikala mambu ya kinsweki. Yandi zaba yonso.
- Yesu zabaka masumu ya nkento ya Samaria, kansi keti Yandi sambisaka yandi?
- Ikele ve. Yandi zolaka kupesa yandi masa ya moyo sambu yandi kuvanda na nzala diaka ve. Yandi songaka nkento yina nde Yandi vandaka Mvulusi, Muntu mosi kaka ya lenda vulusa yandi.
- Kiteso mosi, Yesu zaba mambu yonso ya nge me sala, mpi. Yandi zaba masumu na nge yonso. Kansi, Yandi ke sambisa nge ve, kansi Yandi zola pesa nge masa ya moyo. Yandi mene kudipesa sambu na nge.
- Yesu zola kuvanda Mvulusi na nge. Yandi zola kulolula masumu na nge. Yandi zola sukula nge, kukatula nsoni na nge yonso. Yandi zola kupesa nge ntima ya mpa ti moyo ya mpa.

- Kana nge me yamba Yesu Kristo ntete ve bonso Mvulusi na nge, nge lenda yamba Yandi bubuyai. Keti nge zola kwenda na sika ya beto ya lombilu bubuyai? Keti nge me yilama kutuba “Ee” na Yesu Kristo?

### **Devoir sambu na bakristo:**

Kana nge me yamba Yesu, kansi tii ntangu yai, nge ke bambuka kaka mambu ya nsoni ya nge salaka, kaka songa Yesu ti lomba lusadisu na Yandi. Dezia Yandi me lolula nge. Lomba Yandi kusukula memoire na nge. Bubuyai, mono ke natila nge bise ya me katuka na Yesu. Kana nge zola Yandi kusimba nge ti kusukula memoire na nge, telama sesepiyai. Kwisa awa ti mono ta simba nge. (Longi, kana bana kwisa, nge simba bo na kiese. Songa mwana na mwana ya kwisa nde Nzambi zola yandi. Tula bo yonso na lombilu, kulomba nge Yesu sukula memoire na bo ti fulusa yo diaka na bamemoire ya kiese.)

Ntangu yai, bonso Yesu me lolula nge, Yandi zola nge mpi kulolula bantu ya nkaka. Keti nge zaba muntu ya me pesa nge mpasi? Keti nge ta lolula yandi na zina ya Yesu? (*Longi, twadisa na ntangu ya lombilu kulolula bampangi ya nkaka.*)

*Longi, pesa bana papier ti bacrayola ti pesa bo encouragement kudessiner Yesu kusimba bo na luzolo, ti bo kulolula muntu ya nkaka. Sosa lusadisu ya Mpeve ya Nzambi bu nge meka kusolula badessin ya bana me sala. Lomba Nzambi kusonga nge bana ya lenda vanda na mfunu ya lombilu special.*

### **Verse ya kulonguka:**

*Bankunga 69:6*

*“Nzambi, masumu na mono kele ya kubumbana ve,  
nge zaba mutindu mono vandaka zoba.”*

### **Bankunga ya kwenda nzila mosi ti leso yai:**

YESU ZABA MBI NA MONO

Yesu zaba mbi na mono

Yandi zola lolula!

YESU PESAKA MASA

Yesu pesaka yandi masa

Ya katukaka na nto ve (2x)

Yandi basikaka kuyimba  
Yandi vutukaka kunata  
Bantu ya nkaka kumona  
Yesu Mesia. Yesu Mesia

Yesu zabaka yonso  
Ya yandi me salaka (2x)

Yandi bakisaka nsoni  
Na kati ya ntima n'yandi  
Yesu lolulaka yandi  
Bu yandi kwikilaka.

Bu yandi kwikilaka.  
Bu yandi kwikilaka.



## **LESO 3—YESU ZOLA MONO.**

Yesu sakumuna bana, Matayo 19:13-15, Romans 5:8

### **Kikuma ya Leso:**

Na nsuka ya lesu yai, konso mwana ta bakisa na ntima nde Yesu zola yandi, ti Yesu zola kubaka yandi na dikanda ya Yandi. Bo ta mona Yesu bonso Nduku na bo, ebuna bo ta zola vanda nduku ya Yesu, mpi.

### **Kuyantika Leso:**

- Na ntima na yandi yonso, Sami zolaka oncle na kutala yandi na disu ya mbote.
- Oncle yina, yandi vandaka mosi ya bambuta ya bwala.
- Bantu monaka oncle bonso bakala ya nene, ya mfunu. Bantu mingi sosaka mayele ti lusadisu na yandi.
- Sami zolaka nde oncle kuwa yandi mpi.
- Yandi bingaka, “Oncle! Oncle! Oncle!”
- “Katuka, Sami!” Oncle vutulaka. “Mono ke na ntangu ve sesepiyai.”
- Na nkokila, Sami mekaka diaka. Yandi bendaka lele ya Oncle.
- “Nge ke monaka ve nde mono kele occupe?” Oncle tubaka. “Nge katuka.”
- Sami mekaka diaka ti diaka, kansi yandi monaka ve mpila kusolula ti Oncle na yandi. Ntangu yonso, Oncle vandaka kaka occupe. Yandi monaka ntangu ve kusolula ti mwana bonso Sami.

### **Kulonga Leso ya Bible:**

- Muntu mosi ikele, muntu mosi ya nene ti ya mfunu, ya monaka bana mfunu mingi. Yandi monaka ntangu na kuyamba bo. Ata mbala mosi ve muntu yai tubaka nde Yandi lenda ve mona ntangu ya kusolula ti bana.
- Muntu yai vandaka Yesu Kristo. Lumbu mosi, Yesu vandaka kulonga bantu. Bantu mingi vandaka kulanda Yandi. Yandi vandaka longi mosi ya nene. Yandi vandaka na malongi mingi ya mfunu kupesa bantu.

- Ntangu Yesu vandaka kulonga, bibuti nataka bana ya fioti na bo na Yesu. Bo zolaka Yesu kutula bo maboko, ti kusakumuna bo, ti kusambila bo Nzambi.
- Balonguki ya Yesu ndimaka ve. Mbala ya nkaka bo monaka nde bonso Yesu vandaka longi ya nene ti ya mfunu, Yandi lenda ve solula ti bana ya fioti.
- Ebuna, bo yantikaka kunganina bibuti yina. Mbala ya nkaka bo tubaka mutindu yai: “Kwenda katuka! Bana yonso katuka! Inki mutindu beno lenda nata bana ya fioti bonso yai na Yesu? Beno ke bakisaka ve kinene ya Yesu?”
- Yesu monaka mambu yina. Yandi monaka nde balonguki zolaka kukula bana. Yesu ndimaka ve mpila bo vandaka kusala to bandinga bo vandaka kutuba.
- “Ikele ve!” Yesu tubaka. “Bika bana ya fioti bo kwisa na Mono. Beno kula bo ve. Kimfumu ya Nzambi ke lunga sambu na bana ya fioti bonso bo.”
- Yandi tubaka mpidina sambu bana yambaka Yesu na kiese yonso. Bo vandaka nswalu ya kukwikila Yandi. Ee, yai kele mutindu bantu yonso kota na fami ya Nzambi, kimfumu ya Nzambi—kaka kuyamba ti kukwikila Yesu bonso bana yai salaka.
- Ebuna, Yesu tulaka bana yina maboko. Yandi sambilaka bo Nzambi. Yandi sakumunaka bo.
- Yandi songaka nde Yandi zolaka bo mingi.
- Yesu zola NGE, mpi. Ata muntu ya nkaka yindula ve nde nge kele mfunu, Yesu ke mona nge mfunu. Yandi ke zola nge, ti Yandi zola kuyamba nge bonso mwana na Yandi.

**Yula bana bonso yai:**

- Nani zolaka kunata bana na Yesu?  
(Bibuti na bo.)
- Nani zolaka kubuya bana yina?  
(Balonguki ya Yesu)
- Inki mutindu Yesu songaka nde Yandi zolaka bana?  
(Mpila Yandi tulaka bo maboko, yambaka bo, ti sambilaka bo Nzambi.)
- Yesu zola nani bubuyai?

(Yandi zola bantu yonso. Yandi zola mono.)

**Verse ya Bible kulonguka:**

*Roma 5:8*

*“Kansi Nzambi songaka beto mutindu yandi ke zolaka beto: Kristof waka sambu na beto ntangu beto vandaka kaka bantu ya masumu.”*

*(Longi, na nima bana me tuba verse yina, bo lenda tula zina na bo mosi na sika na ndinga “beto”.)*

**Kubinga bavidi na Yesu:**

- Nzambi zola nge. Yesu zola nge. Yandi ke mona nge mfunu. Yandi fwaka kufuta mfuka ya masumu na nge yonso. Kana nge me ndima Yesu ntete ve, keti nge zola ndima Yandi bubuyai?
- Kwise na mono na nima ya classe ti mono ta vanda na kiese na kusadisa nge.

**Bankunga ya kwenda nzila mosi ti leso yai:**

YESU KE ZOLA MONO

Yesu ke zola mono  
Bibila ke tuba yo!  
Bana ya fioti yonso,  
Ya’ ke pesa bo ngolo!

Ee, Yesu zola  
Bana ya fioti  
Ee, Yesu zola  
Bib’la ke tuba yo!

YESU ZOLA BANA YONSO

Yesu zola bana yonso  
Bana yonso na ntoto  
Konso ndombe, mbwaki, mpembe,  
Yesu zola bo yonso  
Yesu zola bana yonso na ntoto!

**Devoir sambu na bakristo:**

Kana nge zaba nde Yesu zola nge, nge lenda songa luzolo na Yandi na bantu ya nkaka. Nge lenda songa luzolo na mpila nge tuba na bantu ya nkaka, ti na mpila nge sala ti bo. Nge lenda songa luzolo na kukaba ti bo ti kusadisa bo.

Bana tuba ti bageste:

Nzambi me songa luzolo na mono.

Mono ta songa luzolo na bantu ya nkaka.

**Nkunga ya kwenda nzila mosi ti leso yai:**

KANA NGE ME VULUSWA

Kana nge me vuluswa

Tubila bampangi

Nsangu ya Yesu

Kana nge me vuluswa

Tubila bampani

Sambu bo ta zaba Yesu, mpi!



## **Leso 4: YESU ZOLA LOLULA MONO.**

**Histoire ya Yesu na zulu ya kulunsi, Luka 23:32-47**

### **Kikuma ya Leso:**

Na nsuka ya lesu yai, konso mwana ta zaba nde Yesu zola kulolula masumu na yandi. Ntangu yandi baka ndolula yina, yandi ta mona mpila kulolula bantu ya nkaka ya me pesa yandi mpasi na luzingu na yandi.

### **Kuyantika Leso:**

- Tomi vandaka na mawa mingi na ntima. Yandi mpi vandaka makasi mingi. Yandi vandaka na mawa sambu basoda me fwa leki na yandi. Ntima na yandi vandaka na nzala ya mingi kumona leki na yandi diaka! Yandi bambukaka mpila bo vandaka kusakana. Yandi bambukaka mpila leki na yandi vandaka kuseka.
- Tomi vandaka na makasi na ntima na yandi, mpi. Yandi vandaka na makasi sambu yandi zabaka nani me fwa leki na yandi, ti muntu yina zingaka bwala mosi ti yandi. Yandi waka makasi diaka konso mbala ya yandi monaka muntu yina.
- Tomi zolaka ve nde makasi kubikala kaka na ntima na yandi. Yo pesaka yandi bonso maladi. Kansi inki mutindu kumanisa makasi yina? Inki mutindu kulolula muntu ya me fwa leki na yandi? Mpasi me luta mingi tii yo fulusaka yandi mvimba.

### **Kulonga Leso ya Bible:**

- Histoire ya beto ta mona na Bible bubuyai, yo ke songa mpi muntu ya zwaka mputu ya nene na ntima na yandi. Yo salamaka ve sambu yandi me sala mbi. Luzingu na Yandi ya mvimba, Yandi me sala ata mbi mosi ve. Yandi me sala kaka mbote konso ntangu. Zina na Yandi vandaka Yesu.
- Ata Yesu me sala kaka mbote, bantu ya nkaka waka kimpala sambu na Yandi, sambu bantu mingi landaka Yandi, ti bo waka malongi na Yandi.
- Bantu yai ya kimpala, bantu yai ya mbi, bo fundaka Yesu sambu basoda kukanga Yandi, kutula Yandi na zulu ya kulunsi, kubula banonso na maboko ti na makulu na Yandi, yonso sambu Yandi kufwa.
- Bamiyibi zole vandaka na zulu ya bakulunsi mpi—mosi na diboko ya Yesu ya kinkento ti mosi na diboko na Yandi ya kibakala. Bo me sala mbi. Bo me pesa mpasi na bantu ya nkaka. Lufwa lungaka na bo.

- Ti kuna, na kati-kati ya bamiyibi yai zole, vandaka Yesu—Yesu ya mbote, Yesu ya lunungu, Yesu ya kukonda masumu. Yesu ya salaka kaka mambu ya mbote. Yesu, ya songaka bahistoire ya kitoko; Yesu, ya belulaka bamalade mingi; Yesu, ya basisaka bampeve ya mbi; Yesu, ya tedimisaka bafwa. Yesu Kristo vandaka na zulu ya kulunsi sambu bo kufwa Yandi.
- Kuvanda na zulu ya kulunsi, yo pesaka Yesu mpasi. Bo bulaka bansonso na maboko na Yandi, ti na makulu. Ai-yai! Bo pusaka mpu ya “lukumu” ya bansende na ntu na Yandi. Yo pesaka mpasi ya mingi.
- Ebuna Yesu talaka na zulu. Yandi yantikaka kusambila Nzambi. Yandi vandaka kusamba inki?
- Keti Yandi vandaka kusamba nde, “Tata, bula bo yonso sesepiyai sambu bo kufwa!” ? Ikele ve.
- Keti Yandi vandaka kusamba nde, “Tata, kufunda bantu yai ya mbi!” ? Ikele ve.
- Keti Yandi vandaka kusamba nde, “Tata, kulolula bo ve ata fioti sambu na mpila bo me sala Mono!” ? Ikele ve.
- Yesu vandaka kusamba Nzambi. Yandi vandaka kulomba nde, “Tata, lolula bo, sambu bo ke bakisa ve inki bo ikele kusala.”
- Kaka yindula yo! Ntangu bo vandaka kupesa Yesu mpasi mpila ve, Yandi vandaka kusamba nde Tata Nzambi ta lolula bo.
- Kaka na ntangu ya Yesu vandaka kusamba Nzambi nde Yandi lolula bo, basoda ya nkaka vandaka kubula zeke sambu na kuzenga nani ta baka bilele na Yandi. Bo me katula bilele na Yandi yonso ntangu bo tulaka Yesu na zulu ya kulunsi. Yandi me bikala penepene na kinkonga.
- Kaka na ntangu ya Yesu vandaka kusamba Nzambi nde Yandi lolula bo, bantu ya nkaka vandaka kuseka ti kusaula Yandi. “Yandi gulusaka bantu ya nkaka,” bo tubaka. “Bika Yandi kudigulusa, kana Yandi kele Mesia-Mvulusi ya kieleka.”
- Yesu vandaka na ngolo ya kudigulusa. Yandi vandaka Mwana-Nzambi. Yandi vandaka na ngolo yonso. Kansi kana Yandi salaka yo, mpila ta vanda ve kugulsa beto. Kana Yandi kudigulusaka, Yandi zolaka kuvanda na mpila ve kukatula masumu na beto, kuvanda Mvulusi na beto. Yandi bikalaka na zulu ya kulunsi sambu na beto, sambu beto vandaka na mfunu ya Mvulusi.

- Basoda mataka na zulu ya etagere penepene na kulunsi sambu na kupesa Yesu ya kunwa. Kansi bo pesaka Yandi masa ve ya kitoko. Bo pesaka Yandi vinaigre! Ew! (Longi, pesa bana vinaigre kaka ndambu na zulu ya musapi, kana bo zola, sambu bo lenda tesa yo.)
- Bantu mingi vandaka kuseka Yesu. Bo tubaka mpi, “Kana nge ikele mfumu ya Bazwif, kudigulusa!”
- Mosi ya bamiyibi ya vandaka na zulu ya bakulunsi na lweka ya Yesu, yandi sekaka Yesu mpi. “Kana nge kele Mesia, kudigulusa ti gulusa beto mpi!” yandi tubaka.
- Kana bantu kuseka nge, yo pesa mpasi na ntima. Ata muntu mosi ve zola bantu kuseka yandi! Yo pesaka mpasi na Yesu, mpi.
- Kansi muyibi ya zole, yandi tubaka nde, “Yesu, Mfumu, bambuka mono ntangu nge vanda na zulu ya kiti ya kimfumu na nge.” Yandi vandaka kuseka ve. Yandi bakisaka nde Yesu me sala mbi ve. Yandi kwikilaka nde Yesu vandaka Mesia bonso Yandi tubaka.
- Yesu monaka lukwikilu na yandi, ti vutulaka yandi nde, “Kieleka mono ke songa nge, bubuyai nge ta vanda ti Mono na Paladiso, bwala ya kitoko ya Tata na Mono.”
- Ntangu Yandi tubaka yo vandaka penepene na midi. Nswalu, yonso kumaka ya mpimpa bonso minuit.
- Bantu me bula Yesu fimbu. Bo me benda nsuki ya mandefo na Yandi. Bo me losila Yandi mate. Bo me bula banonso na maboko na Yandi. Bo ke seka Yandi. Bo me saula Yandi.
- Kansi Yesu me lolula bo. Yandi me samba nde Tata Nzambi kulolula bo.
- Kiteso ya quinze heures, Yesu sambaka diaka. “Tata, mono pesa mpeve na Mono na maboko na Nge,” Yandi tubaka. Ebuna, Yandi fwaka.
- Mwana ya Nzambi ya kitoko, ya ntalu, ya nlongo, ya kukonda masumu, Yandi kufwaka.
- Mosi ya basoda ya me tala mambu yai yonso, yandi yitukaka. “Kieleka, muntu yai vandaka muntu mosi ya mbote, ya lunungu,” Yandi tubaka. “Kieleka, Yandi vandaka Mwana-Nzambi!”

**Kuyula bana bonso yai:**

- Ntangu Yesu vandaka na zulu ya kulunsi, bantu salaka Yandi inki mambu ya mbi?  
(Kuseka ti kusaula yandi.)

- Yesu sambaka inki mutindu sambu na bantu ya vandaka kupesa Yandi mpasi?

(Tata, lolula bo, sambu bo bakisa ve inki bo kele kusala.)

### **DEVOIR SAMBU NA BAKWIKIDI:**

Awa na Congo, bantu mingi me mona mpasi na kati ya bamvita ya me salama, ti bima terribe ya me salama. Bantu ya nkaka me mona mpasi na banzila, ti na kinsukami, ti na kindoki. Kansi ata muntu mosi ve me mona mpasi kuluta Yesu Kristo.

Kansi Yesu simbaka ve makasi na ntima sambu na bantu ya pesaka Yandi makasi. Yandi lolulaka bo, ti Yandi kufwaka na ngemba. Yandi bikalaka ve na lufwa. Bilumbu tatu na nima ya lufwa na Yandi, Yandi telamaka, bonso Yandi me silaka nde Yandi ta sala! Bubuyai Yandi kele na moyo ya mvula na mvula.

Nge kele na mfunu ya kulolula nani? Keti nge ta lomba Nzambi kusadisa nge kulolula bo?

Kana nge simba makasi na nge, yo kele bonso nge ke nata mulangi ya poison. Yo kele bonso nge ke nwa yo ndambu-ndambu. Yo pesa nge maladi ya ngolo. Yo katula ngemba ti kiese.

Kansi, ntangu nge lolula bantu ya me pesa nge mpasi, yo kele bonso nge me losa poison yina. Yo lenda sala nge mbi diaka ve. Yo lenda pesa nge maladi diaka ve. Ngemba ti kiese lenda vutuka na luzingu na nge.

Beto yonso kele na mfunu kulolula bantu ya me pesa beto mpasi, ti beto ke na mfunu nde bantu ya nkaka lolula beto mpi ntangu beto pesa bo mpasi. Beto mpi, beto yonso me sala mbi ya me pesa mpasi na bantu ya nkaka, ti na Nzambi na beto.

*(Longi, pesa bana bapapiers ti bacrayon sambu bo dessiner bantu ya bo zola kulolula.)*

### **VERSE YA BIBLE KULONGUKA:**

*Luka 23:34a*

*Ntangu yai Yesu tubaka nde: "Tata, lolula bo, sambu bo ke zaba ve mamu yina ya bo ke sala."*

### **KUBINGA BANA YA ME YAMBA YESU NTETE VE:**

Beto yonso ke na mfunu na ndolula ya Nzambi. Beto me sala mambu ya pesaka bantu ya nkaka mpasi, kansi kuluta yo, beto me sala mbi ya me pesa Nzambi mpasi. Ntangu beto ndima Mwana ya Nzambi, Yesu Kristo, Yandi lolula beto sambu na mambi ya beto yonso, ti Yandi sukula ntima na beto. Yandi pesa beto ntima ya kitoko, ntima ya mpa na ntwala ya Nzambi.

Keti nge me ndima Yesu Kristo? Kana nge zaba ve na kieleka yonso, nge lenda yamba Yandi sesepiyai. Kaka binga Yandi sika ya nge ikele. Ndimas masumu na nge. Songa Yandi nde nge kwikila Yesu. Lomba Yandi kukota ntima ti luzingu na nge ntangu yai. Vutula matondo sambu na ndolula ya masumu na nge. Kana nge me samba mutindu yina, bubuyai mbala ya ntete, ebuna, na nima ya classe, kwisa na mono sambu beto lenda yangalala ti nge.

**BANKUNGA YA KWENDA NZILA MOSI TI LESO YAI:**

**MASUMU NA MONO ME KWENDA**

Ma-su-mu na mono me kwenda  
Yesu me katula yo, Alleluya!

Nzambi mene vila yo  
Yo ikele diaka ve  
Mono me kuvuluswa  
Kiese! Ma-su-mu  
Yonso me kwenda!

**BETO ZOLANA**

Bana ya Nzambi  
Beto zolana

Zola me luta nene  
Beto zolana

Bana ya Nzambi  
Beto zolana  
Zola me luta nene!

Bana ya Nzambi  
Beto lolula

Lolula bampani yonso  
(Beto lolula)

Bana ya Nzambi  
Beto lolula  
Lolula bampangi yonso.



## **Leso 5: YESU ZOLA SADISA MONO KULOLULA BANTU YA NKAKA.**

Histoire: Yosefi lolula bambuta na Yandi.

Histoire yai ke monika na Bible na: Kuyantika 37:12-28, 45:1-5, 47:1-6) Efezo 4:32

### **Kikuma ya Leso:**

Na nsuka ya lesu yai, bana ta bakisa nde Yesu lenda sadisa bo ti pesa bo ngolo kulolula bantu ya nkaka, ata ntangu yo kele mpasi mingi kusala. Ebuna bo ta yantika ndambu ya ndambu ya kulolula bantu yonso ya me pesa bo mpasi.

### **Kuyantika Leso:**

- Simoni mengaka oncle na yandi. Oncle na yandi tubaka na yandi na mpila mosi ya lungaka ve. “Nzo na mono me fuluka mingi—yonso sambu na nge. Kisika kele ve sambu na nge awa,” yandi tubaka.
- “Mono baka madia ya kulunga ve,” yandi tubaka. “Yonso ke sambu na nge. Konso ntangu mono fweti kabisa madia ti nge. Divumu na nge me luta nene.”
- “Mono ke na mbongo ve kufuta frais de classe na nge. Nge ta vanda ata muzoba, ata nge longuka. Nzo-nkanda ta sadisa nge ve sambu nge kaka muzoba.”
- Bandinga yina pesaka Simoni mpasi mingi na ntima. Ntangu oncle na yandi tubaka mpidina, Simoni monaka bonso yandi zolaka kudila.
- Yandi lombaka ve bibuti na yandi nde bi kufwa. Yo vandaka faute na yandi ve nde nzo ya oncle vandaka fioti.
- Ee, oncle na yandi pesaka yandi sika ya kulala. Yina vandaka kieleka. Simoni zabaka nde yandi fweti vanda na ntima ya lutondo sambu na yo, kansi yandi bakisaka nde oncle na yandi zolaka yandi ve ya kieleka.
- Simoni yantikaka kumenga oncle na yandi. Yandi yantikaka kuyindula bampila kutuba na oncle na yandi ya ta songa ntima yina ya makasi. Yandi yantikaka kuyindula inki mutindu yandi lenda vutula mpasi na oncle, bonso oncle me pesa yandi mpasi.
- Inki Yesu ta zola Simoni kusala? Inki mutindu Yesu ta zola Simoni kutuba na once na yandi, ti kusala ti yandi?
- Na kati ya Bible, keti muntu lenda monika ya fami na yandi salaka mbi na yandi mutindu oncle me sala yandi mbi?

## Kulonga leso:

- Ee, na kati ya Bible beto mona muntu mosi zina ya Yosefi. Yai vandaka ve Yosefi ya sansaka Yesu bonso tata na kileki na yandi. Yosefi yai zingaka bamvula mingi na ntwala ya Yesu.
- Beto mona histoire na yandi na mukanda ya Kuyantika, mukanda ya ntete na kati ya Bible, na kati ya Kuwakana ya Ntama.
- Yosefi zingaka ti tata na yandi Yakobo na fami ya nene. Yosefi vandaka na bambuta ya bakala kumi, ti leki ya bakala mosi. (*Longi, bana lenda songa misapi kumi sambu na bambuta ya bakala, ebuna musapi mosi sambu na leki na yandi ya bakala, ti mosi diaka sambu na Yosefi, yandi mosi.*) Kumi plus mosi, plus mosi. Bana yonso na fami ya Yakobo vandaka kumi na zole.
- Tata Yakobo zolaka Yosefi mingi. Bambuta yonso, bo monaka pwelele nde Yosefi vandaka favori ya tata, ebuna bo waka yandi kimpala. Bo mengaka yandi. Yandi vandaka leki na bo, kansi bo monaka mpila ve kusolula ti yandi mbote. Bo zolaka kaka kunwana ti yandi.
- Lumbu mosi, Tata Yakobo tindaka bambuta ya Yosefi kumi kusansa mameme na yandi. Baleki zole ya fami, Yosefi ti leki na yandi Benyamini, bo bikalaka ti tata na bo.
- Na nima ya ntangu, Tata me zenga kutinda Yosefi kutala inki mutindu bambuta na yandi.
- Ntangu bambuta monaka Yosefi vandaka kukwisa, bu yandi vandaka kaka ntama, bambuta yina yantikaka kuyidika lukanu inki mutindu bo lenda kufwa yandi.
- Kieleka! Bo vandaka na lukanu nde bo ta fwa leki na bo! Muntu songaka bo ve kusala mpidina. Kaka kimpala fulusaka bantima na bo na mpila nde bo yindulaka lukanu yina bo mosi!
- Lukanu na bo vandaka nde bo kufwa Yosefi, bo losa mvumbi na yandi na kati ya dibulu. Ebuna, bo yindulaka kukusa tata na bo. Bo yindulaka kusonga yandi nde mbisi ya makasi kangaka yandi ti kudiaka yandi mvimba. Bo yindulaka kusonga tata kaka bilele ya Yosefi. Bo yindulaka ve mutindu yai ya pesa tata mpasi ti mawa.
- Mosi na kati ya bambuta, zina na yandi Rubeni, yandi ndimaka ve lukanu na bo. Yandi songaka bambuta ya nkaka nde mbote bo kufwa Yosefi ve. Yandi tubaka nde bo lenda kaka kukanga yandi, kulosa yandi na dibulu, ti bika yandi kuna ya moyo. Ata bo zabaka mbote nde yandi fweti kufwa na dibulu yina, yo ta vanda ve maboko na bo mosi ya salaka yo. Yai mpila bo yindulaka.



- Rubeni zolaka kusonga bampangi na yandi ve, kansi yandi vandaka kusosa mpila kuvulusa moyo ya Yosefi. Yandi yindulaka nde yandi ta vutuka na kinsweki na nima, ti yandi ta sadisa Yosefi kubasika na dibulu yina.
- Yosefi kumaka penepene na bo. Ntangu yandi kwisaka na bo, bo yonso kangaka yandi. Bo katulaka bilele na yandi na kingolo-ngolo. Bo losaka yandi na kati ya dibulu, mpila Rubeni tubaka. Dibulu yina, yo vandaka nto ya ntama ya me yuma na mpila nde masa vandaka diaka ve na kati na yo.
- Yosefi monaka ve mpila kubasika na dibulu sambu yo vandaka mudindu. Yosefi dilaka. Inki nge banza yandi tubaka? Mbala ya nkaka yandi tubaka bandinga bonso yai: “Bampangi na mono! Sambu na inki beno ke sala mono mpidina? Mono me kwisa sambu na kutala inki mutindu beno. Tata zola kuzikisa nde beno kele mbote! Beno me sakana ti mono. Ntangu yai, kwisa, katula mono na nto yai!”
- Kansi ata Yosefi dilaka konso mutindu, bambuta na yandi wilaka yandi ve. Kaka bo vandaka na zulu ya ntoto, sambu na kudia madia yandi me natila bo, bonso bo me sala ve ata mbi mosi.
- Ntangu bo vandaka kudia, bo talaka ti bo monaka caravani ya bacomersant ke kwisa na zulu ya bachamo. Bantu yina sumbaka bima na ntalu na nsi, na nima bo tekaka yo na bazandu na ntalu ya zulu. Bo me sumba baespice mingi ya bo yindulaka kuteka na nsi ya Ezipte, awa na Afrika.
- Ntangu yina, mbuta mosi zina ya Yuda, yandi zwaka ngindu. “Inki mambu ya mbote beto ta mona kana beto kufwa leki na yandi?” yandi yulaka. “Beto teka yandi na bacomersant yai. Konso ntangu, bo ke sosa bantu ya bo lenda teka kuvanda bampika.”
- Ebuna bo bendaka Yosefi ti katulaka yandi na dibulu ya nto. Mbala ya nkaka Yosefi vandaka na kiese. Mbala ya nkaka yandi yindulaka nde nsaka na bo me mana, ti yandi ta vutuka na tata na kiese.
- Kansi yo salamaka ve mutindu yina. Bo tekaka Yosefi na bacomersant yina. Bo nataka yandi na nsi ya Ezipte, ebuna bo tekaka yandi kuvanda mpika.
- Na bamvula na nima, Yosefi salaka ngolo. Yandi monaka ntangu ya mbote ti ntangu ya mpasi. Mbala mosi, bo losaka yandi na boloko sambu nkento tubaka luvunu sambu na yandi. Kansi Yosefi vandaka kaka kwikama, ti na nima ya ntangu, yandi kumaka mfumu na Ezipte, muntu ya zole na nima ya Mfumu ya nene Faro.

- Yosefi salaka nsuki na yandi bonso bantu ya Ezipte. Yandi lwataka bilele na yandi bonso bo. Yandi yantikaka kumonika bonso muntu ya Ezipte.
- Na nima ya bamvula, bambuta na yandi kwisaka na Ezipte kusumba madia na ntangu ya nzala. Bo kwisaka kusumba madia na Yosefi. Yosefi zabaka bo, kansi bo zabaka ve yandi vandaka nani.
- Inki Yosefi ta sala? Yandi lenda buya kutekila bo madia, ebuna bo ta fwa na nzala. Yandi lenda kanga bo ti losa bo na dibulu bonso bo me sala yandi. Inki yandi ta sala? Keti yandi ta vutula bo mbi bonso bo me sala yandi mbi?
- Yosefi songaka bantu yonso ya nkaka kubasika na salle. Ebuna yandi yantikaka kudila. Yandi dilaka ngolo, tii bantu na nganda yonso waka kudila na yandi.
- Yosefi tubaka na bambuta na yandi, “Yo ikele mono Yosefi. Keti tata na beto ke zinga tii bubuyai?”
- Bambuta na yandi monaka mpila ve kutuba ata ndinga mosi.
- Yosefi tubaka nde, “Beno kwisa penepene ti tala mono mbote. Mono kele Yosefi, leki na beno, yina beno me teka na Ezipte.”
- “Beno vanda na mawa ve, vanda na makasi ve na yina ya beno me sadila mono. Nzambi me tinda mono awa sambu Yandi vandaka na kisalu ya mono fweti sala awa.”
- Bo vutukaka na tata Yakobo ti bo songaka yandi nde Yosefi vandaka na moyo. Bo yonso kwendaka na Ezipte, ti Yosefi sansaka bo kuna na ntangu ya madia vandaka fioti. Fami vandaka sikamosi diaka.
- Mambu ya mbi me suka na mpila mosi ya kiese, sambu Yosefi simbaka ve mbi to makasi na ntima na yandi. Yandi lolulaka bampangi na yandi mbi yonso ya bo me sala yandi. Yosefi vandaka na kiese mingi kumona tata Yakobo diaka. Yakobo vandaka na kiese kumona Yosefi. Bo yonso vandaka na kiese kuvanda na madia na ntangu mosi ya nzala. Bo yonso vandaka na kiese kuvanda fami diaka.
- Kulolula kele mambu mosi ya ngolo ya lenda sadisa beto mingi.

#### **Kuyula bana bonso yai:**

- Bampangi ya Yosefi salaka yandi mbi inki mutindu?

(Bo tulaka yandi ti dibulu ti bo tekaka yandi kukuma mpika na nsi ya nkaka.)

- Na nima ya bamvula, Yosefi sadisaka bo inki mutindu?  
(Yandi tekilaka bo madia na ntangu bo vandaka na nzala.)
- Sambu na inki bampangi ya Yosefi zabaka yandi ve nswalu?  
(Yandi me kuma kumonika bonso muntu ya Ezipte.)
- Na nima kulolula bo, Yosefi salaka bampangi na yandi inki mambu ya mbote?  
(Yandi natilaka fami ya mvimba na Ezipte ti yandi sansaka bo kuna na Ezipte sambu bo kufwaka ve na nzala.)
- Kulolula ya Yosefi, yo sadisaka nani?  
(Yo sadisaka bo yonso, ti Yosefi yandi mosi na kati.)

#### **Devoir sambu na bakristo:**

Kulolula ke sadisa beto mingi. Yo kele mpasi kusala yo kana muntu me sala nge mbi, kansi Yesu lenda sadisa nge ti pesa nge ngolo kusala yo. Devoir mono ke pesa nge, yo yai: Yindula nani me pesa nge mpasi. Lomba lusadisya ya Nzambi, ebuna na ntima na nge yonso, lolula muntu yina.

Longi, pesa bana papie. Bo dessiner muntu ya bo ke lolula. Bo dessiner mbi yandi me sala bo. Na nima, bo zenga yo bitini ti beno tima dibulu ti losa bapapier yina na kati kusonga nde mambu yina me mana.)

#### **Kubinga bana ya me ndima Yesu ntete ve:**

Nge mpi kele na mfunu nde Nzambi kulolula nge. Beto yonso me sala ti beto me tuba mambu mingi ya me lunga ve na meso ya Nzambi. Nzambi ke wilaka beto makasi sambu na masumu na beto, kansi kana muntu ta kwikila Yesu Kristo, Nzambi ta lolula beto masumu yina yonso. Yesu me futa dezia mfuka ya masumu yina, ntangu Yandi fwaka na zulu ya kulunsi. Keti nge ta ndima Yesu bubuyai sambu Nzambi kulolula nge?

#### **Bankunga ya kwenda nzila mosi ti leso yai:**

(Na mukanda, "Bankunga ya Ecodim":)

Kikesa Kele

Kizitu Yonso Mene Katuka

Kwisa na Yesu Kristo

O Yambula (O lolula, o lolula, o lolula bampangi, o lolula!)

Beto Zolana (Bana ya Nzambi, beto lolula, Beto ke fami mosi (O lolula) Beto ke fami mosi!

===

NSUKA YA BALESO YONSO YA 'YESU TI MONO'

===

**NB: Atasio, longi!**

Ntangu yai, nge me manisa kusadila baleso yai. Baleso ya mpa ke kinga nge na Centre des Materiels, sika nge me defa baleso yai. Mabundu ya nkaka mpi ke kinga kudefa baleso yai sambu bo mona mpila kulonga bana na bo. Ntangu yai, vutula materiels yonso na sachet ti vutula yonso na Centre des Materiels ya MCE. Merci mingi sambu na collaboration ya nge !